

大方廣佛華嚴經卷第二十

坐十

東晉天竺三藏佛陀跋陀羅等譯

金剛幢菩薩迴向品第二十一之六

菩薩摩訶薩布施莊嚴遊戲園林時作如是念我當為一切衆生作愛樂法林我當為一

切衆生示現悅樂之處我當與一切衆生無

量歡喜我當為一切衆生開淨法門超出三

界我當與一切衆生無上菩提滿足諸願我

當為一切衆生而作慈父智慧觀察一切三

界我當惠施一切衆生資生之具令無所乏

我當為一切衆生而作慈母出生善根滿足

諸願菩薩摩訶薩善根迴向無厭足心遠離

一切衆生諸惡迴向正心安隱一切衆生迴

向不求報恩迴向不求衆生利養迴向不求

讚歎迴向除滅一切衆生無量苦惱迴向一

切衆生其心清淨猶如虛空迴向一切衆生

善根為首觀察一切諸法真實迴向一切衆

生以大莊嚴而自莊嚴永離苦陰迴向於摩

訶衍願而無厭足永離邪見具足修習菩薩

所行及諸大願迴向菩薩摩訶薩以施莊嚴

遊戲園林所攝善根迴向衆生令一切衆生

得轉勝善根究竟成就無上菩提園林之心

令一切衆生得不動法普見諸佛皆悉歡喜

令一切衆生常樂法林遠得佛刹娛樂園林

令一切衆生得淨妙心常見如來大神足林

令一切衆生悉樂如來自在遊戲智慧自在

遍遊十方令一切衆生修習法戲詣諸佛刹

諮受道化令一切衆生樂菩薩戲盡未來劫

修菩薩行心無疲倦安住解脫令一切衆生

見一切佛充滿法界樂佛大心清淨園林令

一切衆生詣諸佛刹其心忻樂供養諸佛令  
一切衆生樂離欲心清淨莊嚴一切佛刹是  
爲菩薩摩訶薩布施莊嚴遊戲園林善根迴  
向令一切衆生遊戲一切諸佛園林見一切  
佛復次菩薩摩訶薩作無量億那由他阿僧  
祇大衆施會坐十離惡清淨諸佛所歎普淨衆生  
永離衆惡淨三業迹生薩婆若心無量境界  
皆悉清淨無量百千萬億那由他布施之具  
皆悉莊嚴而以惠施菩薩摩訶薩以大施會  
所攝善根迴向衆生令一切衆生悉得無上  
菩提之心行無量施皆悉清淨令一切衆生  
皆悉究竟無量無邊清淨之道令一切衆生  
行無量慈隨衆所須悉令滿足令一切衆生  
行無量悲悉能救護一切衆生令一切衆生  
隨順三世如來正教令佛歡喜令一切衆生

於諸佛所修行布施心中不悔令一切衆生  
皆悉長養勝妙信根於念念中修行增進無  
量布施令一切衆生得摩訶衍心皆悉成就  
大乘施會令一切衆生成大善會施究竟施  
善施勝施隨願施第一施上施無上施無等  
施出世間施一切諸佛所讚歎施令一切衆  
生成第一施主於諸惡道拔出衆生安置無  
礙清淨智道修平等願真實善根得無等等  
如來智慧令一切衆生安住寂靜諸禪定智  
趣不死道究竟一切通明智慧勇猛精進具  
足諸施莊嚴佛法究竟彼岸永不退轉令一  
切衆生得不退轉大乘之會給施衆生而無  
休息究竟無上一切種智令一切衆生種諸  
善根悉到無量功德彼岸令一切衆生諸佛  
所歎普爲一切作大施主功德具足充滿法

界普照十方施無上樂令一切眾生悉爲平等大布施究竟善根等攝眾生令一切眾生爲勝施主建立一切於無上乘令一切眾生爲應時施主悉離非時究竟時會令一切眾生爲善施主具大人施法到於彼岸令一切眾生爲嚴淨施主至一切佛薩婆若處令一切眾生爲一切淨施主出生積聚法界等功德令一切眾生爲出過一切施主滿足大願度脫眾生安住如來處非處力是爲菩薩摩訶薩大施善根迴向令一切眾生行無上捨究竟佛施成就善施不可壞施諸佛法施愛眼心施救眾生施薩婆若施見諸佛施具威儀施具足菩薩所行功德佛智慧施復次菩薩摩訶薩悉捨一切資生之具心無貪著不求果報世間富樂無所希望捨離愚癡深

解諸法饒益安立一切眾生真實相心解一切法種種莊嚴諸資生具無量境界種種莊嚴資生之具饒益眾生究竟施一切施內外施增長直心令一切眾生具功德寶心善能饒益無量眾生令一切眾生成就寶心令一切眾生清淨善根等三世佛具一切智菩薩摩訶薩以施資生之具所攝善根迴向眾生令一切眾生清淨調伏令一切眾生皆悉嚴淨一切佛剎除滅煩惱令一切眾生以清淨心於念念中充滿法界令一切眾生智慧充滿虛空法界令一切眾生得一切智了達三世於一切時轉不退法輪令一切眾生悉皆示現一切種智巧妙方便饒益眾生令一切眾生悉悟一切諸如來道盡未來劫於一切剎廣說佛法未曾休息令一切眾生於無量

劫修菩薩行心無厭倦令一切衆生於一切世界淨世界不淨世界小世界中世界大世界微細世界廣世界翻覆世界伏世界如是等一切世界皆悉嚴淨菩薩充滿行大乘行令一切衆生於念念中悉作三世一切佛事調伏衆生立薩婆若此菩薩摩訶薩以如是等無量阿僧祇劫饒益衆生令佛法不斷以大悲心救護衆生修習大慈具菩薩行建立一切諸如來論令一切衆生皆悉不斷諸佛善根有來求者悉滿其意而無患厭能施一切心無有悔捨一切物資生之具隨所來方無不忻悅於諸衆生如一子想見來求者心大歡喜作是念言是我善知識爾時菩薩長養大悲心歡喜心不可壞心大施心菩薩摩訶薩見來求者隨其所須悉資給之充滿其

意令無所乏皆令歡喜斷其貧苦具足富樂同聲稱美歎德而歸菩薩爾時心大歡喜於百千億那由他劫受帝釋樂所不能及須夜摩天王兜率陀天王化自在天王他化自在天王百千億那由他劫所受喜樂所不能及梵天王樂乃至淨居天無量無邊阿僧祇劫禪定快樂亦所不及無量無數不可稱說阿僧祇劫轉輪王樂亦不能及菩薩摩訶薩如是大喜無量信心增長直心清淨諸根柔輭定心增廣生菩提心堅固不轉菩薩摩訶薩善根迴向令一切衆生離毒害心令一切衆生安隱快樂令一切衆生得真實義令一切衆生悉得清淨無上菩提令一切衆生悉得平等令一切衆生得賢善心令一切衆生速得普賢菩薩摩訶衍心令一切衆生所行悉

善令一切衆生具普賢菩薩所修願行令一切衆生覺十力乘菩薩摩訶薩以此善根迴向時於身口意業無著無縛解脫心迴向無衆生想迴向無命想無人想無補伽羅想無男子想無年少想無禪頭想無造想無受想無有想無無想無今世後世想無死此生彼想無有常想無無常想非三有想非無三有想非想非無想無縛無著解脫心迴向無業迴向無業報迴向無虛妄迴向無真實迴向無思迴向無思報迴向無心迴向無無心迴向善薩摩訶薩如是迴向時不著內不著外不著緣不著境界不著因不著因緣和合不著法不著非法不著思不著思果不著色不著色取不著色滅不著受想行識不著受想行識取不著受想行識滅菩薩摩訶薩若於

此法中心不著者則不縛色不縛色取不縛色滅不縛受想行識不縛受想行識取不縛受想行識滅若於此法而不縛者則於諸法亦無有解何以故一切諸法不生不滅無有自性無一無二無多無少無有量無無量無善無惡無深無淺無靜無亂無著無離無法無非法無性無非性無有無無故菩薩如是見法則是非法言語道斷故非法爲法而亦不壞一切業迹具修菩薩行不退一切智解知業緣如夢如響如鏡中像一切法如幻而亦不違因緣業報入甚深業解法真實無行無作亦復不違業行之道菩薩摩訶薩以一切善根如是迴向一切種智普遊十方教化衆生迴向者何義永度世間生死彼岸故說迴向度諸陰彼岸故說迴向度語言道彼岸

故說迴向度衆生相彼岸故說迴向度身見  
 彼岸故說迴向度不堅固彼岸故說迴向度  
 諸行彼岸故說迴向度諸有彼岸故說迴向  
 度諸取彼岸故說迴向度諸世間法彼岸故  
 說迴向菩薩摩訶薩若能以此善根迴向則  
 皆隨順一切諸佛生十隨順法隨順智隨順善提  
 隨順義隨順迴向隨順行隨順真實隨順清  
 淨菩薩摩訶薩如是迴向已令一切衆生得  
 如來法諸佛歡喜無佛不值無法不了於一  
 切法無違無失悉能分別一切佛法不捨正  
 法不違因緣內外諸法法力具足無有休息  
 佛子是為菩薩摩訶薩第六隨順一切堅固  
 善根迴向菩薩摩訶薩住此迴向無量諸佛  
 皆悉守護得堅固法修一切智解隨順義解  
 一切法隨順真性得一切法隨順堅固善根

隨順滿足諸願得隨順堅固法一切金剛所  
 不能壞得隨順堅固願於一切法中而得自  
 在爾時金剛幢菩薩承佛神力觀察十方觀  
 察一切大衆觀察法界深入諸法句味之義  
 修無量心大悲普覆一切衆生覺悟三世如  
 來家法入於一切諸佛功德速得諸佛自在  
 之身分別一切諸衆生心隨所種善根應受  
 化時隨順法身示現色身以偈頌曰  
 一切世間諸大王 菩薩現身於彼生  
 處彼尊豪大王位 悉能調伏諸群生  
 其心柔輒常清淨 於一切衆得自在  
 常以正法治天下 方便隨順樂世間  
 菩薩清淨王家生 常能如應轉法輪  
 遠離諸惡正治國 十方衆生無違教  
 菩薩色相功德滿 具足甚深妙智慧

堅固安住不退轉	悉能降伏一切魔
常能具持清淨戒	決定安住忍辱力
除滅一切瞋恚毒	常能修習最勝法
菩薩具行布施法	飲食華鬘乘衣服
塗香房舍明淨燈	如是等施無有量
菩薩所施益眾生	常能開發廣大心
其意清淨大歡喜	布施尊勝及世間
菩薩悉能捨無量	內外所有一切物
所行布施常歡喜	未曾暫有中悔心
菩薩悉能施頭目	手足肌肉及骨髓
一切身分盡惠施	其心未曾生中悔
菩薩處在大王位	清淨豪貴人中尊
大悲以舌施群生	楚毒無量不中悔
菩薩施舌淨善根	迴向一切諸群生
悉令此等眾生類	具足成就廣長舌

菩薩歡喜施妻子	其心未曾生憂悔
又復忻悅施國土	亦能捨身無所恪
隨所樂求盡施與	應時惠施無嫌恨
一切所有能悉捨	諸來求者皆滿足
為法捨身無央數	修諸苦行求菩提
又為眾生受諸苦	求無上智不退轉
聽受如來正法故	以身布施無疲厭
內心歡喜無有量	救護一切眾生成
菩薩得見諸佛已	慈心恭敬設供養
饒益歡喜悉具足	皆能聞持諸佛法
迴向一切眾生類	悉令世間得安樂
普能救護一切眾	永使究竟得解脫
菩薩具足諸眷屬	色身端嚴順教命
妙莊嚴具為校飾	聰睿仁賢巧智慧
以饒益故悉布施	而未曾有微恪心

不為世間資生利	饒益眾生求菩提
具足修習淨功德	履行無量諸勝業
迴向一切眾生類	亦不取業堅固相
菩薩能捨大王位	嚴飾京都諸城邑
宮殿內外一切物	遊觀園林諸池流
無量無數百千劫	以無上心行布施
開悟世間示彼岸	隨順化導群生類
菩薩見有來求者	悉從他方世界至
隨彼所須滿其願	菩薩大喜充遍身
菩薩迴向施功德	三世一切諸如來
所學究竟到彼岸	無上導師之境界
菩薩觀察一切法	誰為度脫眾生者
為度脫誰至何處	解空不捨布施心
菩薩迴向智慧故	菩薩迴向求正法
菩薩迴向甚深義	於一切法無所著

心不分別一切業	於諸業報不染著
了達菩提從緣起	於法真性無所壞
解了己身不染著	其心寂滅無所依
智慧分別無業性	善解因緣非無業
不虛妄取過去法	亦復不取未來法
了達現在無所有	觀察三世悉空寂
菩薩究竟色彼岸	受想行識亦如是
永度一切到彼岸	其心謙順常清淨
觀察五陰十八界	分別諸入及己身
於此諸法求菩提	皆悉空寂不可得
不取諸法常住相	於斷滅相亦不受
一切諸法非有無	諸業因緣和合生
無有眾生得菩提	一切諸法悉寂滅
心不染著諸佛刹	了達三世無所有
若能如是解正法	亦如一切諸最勝



雖復推求無所得 菩薩所得亦不虛  
 是故緣中求諸法 不違一切因緣道  
 分別解說諸業迹 欲令眾生悉清淨  
 是為智者所修行 一切諸佛之所說  
 隨順思惟入正義 自然覺悟無上道  
 諸法無生亦無滅 亦復無來亦無去  
 不於此死而彼生 深解一切諸佛法  
 了達諸法真實性 於法性中無所著  
 永離諸法虛妄相 彼人得見諸佛智  
 分別解了諸法趣 眾生諸趣佛國趣  
 一切三世所有法 皆悉了知無有餘  
 三世諸佛所覺法 悉能具足聞受持  
 所說三世一切法 如是等法悉非法  
 隨順修行一切法 而亦不壞諸法相  
 菩薩迴向諸眾生 令彼疾得一切智

佛子何等為菩薩摩訶薩十一第七等心隨順一  
 切眾生迴向佛子此菩薩摩訶薩增長下品  
 善根中品善根上品善根無量善根廣善根  
 種種善根不可測量善根不可思議善根阿  
 僧祇善根無邊善根佛境界善根法境界善  
 根僧境界善根善知識境界善根一切眾生  
 境界善根方便境界善根修習微妙境界善  
 根內境界善根外境界善根無量別異功德  
 境界善根修習一切施境界善根清淨戒境  
 界善根菩薩內自專正於一切捨忍辱境界  
 善根精進不退轉境界善根入種種禪定境  
 界善根修行諸地智慧境界善根分別一切  
 眾生心心境界善根積集無量清淨功德善  
 根修習正念菩薩業境界善根普覆一切眾  
 生境界善根菩薩摩訶薩行如是等無量善

根修習究竟積集長養廣開解已則能安住  
忍力閉惡趣門善調諸根威儀具足永離顛  
倒決定正趣堪為一切諸佛法器普為眾生  
作無上福田常為諸佛之所守護出生長養  
一切諸佛清淨善根隨順具滿如來大願深  
樂佛業心得自在悉與三世諸如來等普能  
供養一切諸佛究竟一切諸如來力常為諸  
佛之所讚歎不求生天不貪利養不著諸行  
一切善根皆悉迴向為一切眾生作功德藏  
具足諸道普覆一切眾生於生死中拔出眾  
生教令修習一切善根迴向一切境界而不  
斷絕開一切智菩提之門建立智幢嚴淨大  
道普示眾生捨離一切世間塵垢施心功德  
生如來家清淨功德皆悉滿足無上福田不  
著眾生不依世間今一切眾生皆悉清淨修

習攝取一切善根菩薩摩訶薩離垢清淨菩  
提心攝取善根作如是念此菩提心所起善  
根菩提心思惟善根菩提心所得善根菩提  
心正希望善根一向菩提心善根憐愍一切  
眾生攝取一切種智境界究竟十力境界積  
集十力境界不壞法界善根不退轉善根菩  
薩摩訶薩復作是念如此善根所有果報我  
當盡未來際行菩薩行不捨眾生故修行大  
捨迴向一切眾生悉無有餘今無數世界珍  
寶充滿今無數世界寶衣充滿今無數世界  
妙香充滿今無數世界莊嚴具充滿今無數  
世界摩尼寶充滿今無數世界勝摩尼寶充  
滿今無數世界妙色雜華充滿今無數世界  
上味充滿今無數世界金銀充滿今無數世  
界天牀充滿妙寶莊嚴敷以天衣今無數世

界雜寶莊嚴天冠充滿若有一人盡未來劫常來求索以此寶物而惠施之未曾厭倦如一衆生一切衆生亦復如是菩薩摩訶薩如是施時以平等心無偏愛心不求名心無熱惱心無中悔心專求一切智心清淨道心一向施心憐愍心調伏心安住一切智心菩薩摩訶薩善根如是迴向盡未來劫常行布施復次菩薩摩訶薩善根如是迴向一切衆生悉無有餘我當以寶象充滿無數世界七支具足六瘤充滿建大寶幢具金莊嚴白寶網覆一切雜寶而莊嚴之以用布施我當以清淨寶馬婆羅馬王等充滿無數世界以一切馬寶莊嚴具而莊嚴之以用布施無數世界寶女充滿娛樂具足以用布施無數世界男女充滿以用布施無數世界已身充滿以用

布施無數世界已身頭目充滿不放逸心以用布施無數世界已目充滿以用布施無數世界已身充滿堪忍楚毒破骨出髓以用布施無數世界大王坐處皆悉充滿以用布施無數世界給使僮僕皆悉充滿以用布施修習平等一切施心於一世界中盡未來劫修菩薩行爲一衆生於一切世界中盡未來劫修菩薩行爲一衆生爲一切衆生亦復如是具足大悲遠離衆惡普念一切令我布施究竟不退行布施時乃至不生一念憂悔之心菩薩摩訶薩復作是念我行如是無量布施以無著心無縛心解脫心大心甚深心攝取心離憎愛心離壽命心善調伏心不亂心無害心安住一切智心慧光普照一切法心入一切智心菩薩摩訶薩以此善根念念迴向

令一切衆生財寶滿足令一切衆生具足無盡大功德藏令一切衆生得安隱樂令一切衆生長養菩薩摩訶衍業令一切衆生滿足深法令一切衆生得不退轉一切智乘令一切衆生見一切佛令一切衆生普於衆生無所選擇令一切衆生悉得清淨平等之心令一切衆生離諸難處得一切智令一切衆生饒益安樂無量衆生令一切衆生普於一切得平等心令一切衆生得柔軟施心令一切衆生攝取真實惠施之心令一切衆生不失施心令一切衆生具足施心永滅貧窮令一切衆生悉攝世間諸妙財寶無所乏短令一切衆生行無量施令一切衆生行一切施令一切衆生盡未來劫修行布施心無退轉令一切衆生悉捨一切心中悔令一切衆生

隨順行施饒益衆生令一切衆生行勝廣施令一切衆生行種種莊嚴施令一切衆生行無著施令一切衆生行平等施令一切衆生行大力金剛施令一切衆生行如日光明施令一切衆生得如來智令一切衆生善根眷屬具足成滿令一切衆生善根智慧悉現在前令一切衆生得不可壞正直之心令一切衆生具足成就清淨善根令一切衆生於煩惱睡眠智慧覺悟令一切衆生疑惑悉除令一切衆生得平等智慧清淨功德令一切衆生功德悉備無能壞者令一切衆生具足清淨不動三昧令一切衆生具不可壞薩婆若智令一切衆生具足菩薩無量清淨自在正行令一切衆生修習無著清淨善根令一切衆生淨修正念三世諸佛令一切衆生出生

勝妙清淨善根令一切衆生除滅一切諸魔  
魔業障礙道法令一切衆生皆悉履行無量  
功德生諸三昧清淨滿足令一切衆生常念  
諸佛未曾廢忘令一切衆生常見諸佛悉令  
歡喜初不遠離令一切衆生開淨法門出生  
善根諸白淨法平等具足令一切衆生悉得  
無量平等正直之心令一切衆生成就清淨  
平等施心令一切衆生滿足諸佛尸波羅蜜  
平等清淨令一切衆生具大精進波羅蜜未  
曾懈怠令一切衆生得大羸提波羅蜜令一  
切衆生得無量禪波羅蜜智慧分別滿足諸  
通令一切衆生於一切法得離身般若波羅  
蜜平等滿足令一切衆生得清淨法界平等  
滿足令一切衆生悉具淨妙諸通善根令一  
切衆生修平等行具諸善法令一切衆生究

竟永度諸佛境界令一切衆生身口意業平  
等清淨令一切衆生諸業行報平等清淨令  
一切衆生悉得諸法平等清淨令一切衆生  
悉得諸法清淨平等實義令一切衆生悉得  
清淨諸勝妙行令一切衆生悉得菩薩諸清  
淨願令一切衆生普得平等淨功德智令一  
切衆生以諸善根迴向薩婆若乘平等滿足  
令一切衆生顯現一切嚴淨佛刹平等滿足  
令一切衆生得見諸佛除滅一切諸煩惱患  
令一切衆生具諸相好功德莊嚴平等滿足  
令一切衆生得八種聲百千妙聲而莊嚴之  
如來無量功德清淨梵音皆悉具足令一切  
衆生十力莊嚴成就無礙平等之心令一切  
衆生得一切佛無盡法明無量諸辯平等滿  
足令一切衆生得無上無畏人中之雄大師

子吼令一切衆生得一切智轉不退法輪令  
一切衆生出生諸法平等滿足令一切衆生  
善根清淨應不失時平等滿足令一切衆生  
成就清淨調御師法平等滿足令一切衆生  
於淳一莊嚴無量莊嚴大莊嚴諸佛莊嚴平  
等滿足令一切衆生觀察三世分別平等令  
一切衆生詣諸佛所聞法受持解了平等圓  
滿具足令一切衆生慚愧智慧與諸佛等令  
一切衆生得平等智慧觀察諸法令一切衆  
生得不動業報離諸障礙平等滿足令一切  
衆生入甚深智悉分別知衆生諸根平等滿  
足令一切衆生得無分別平等智慧皆悉等  
一清淨滿足令一切衆生隨順無厭善根平  
等分別皆悉滿足令一切衆生於大神足而  
得自在菩薩神力平等滿足令一切衆生悉

得諸佛無盡功德智慧之藏究竟功德皆悉  
等一令一切衆生於諸法中得離虛妄隨順  
平等入一切法智菩提心令一切衆生勝妙  
福田平等滿足令一切衆生得清淨大悲普  
爲世間最上福田令一切衆生堅固無壞平  
等滿足令一切衆生見真實法不可破壞平  
等滿足令一切衆生得最勝心思惟正觀平  
等滿足令一切衆生離諸恐怖入甚深法到  
於彼岸令一切衆生放一光明普照十方等  
度一切令一切衆生悉得菩薩不退精進同  
行同願平等滿足令一切衆生出一言音平  
等滿足令一切衆生於菩薩直心平等滿足  
令一切衆生悉得覩見諸善知識心大歡喜  
令一切衆生皆悉具足菩薩諸行調伏衆生  
未曾休息平等滿足令一切衆生得不斷辯

普入諸音平等滿足令一切衆生能以一心  
知一切心一切善根平等滿足令一切衆生  
修諸善根而不退轉安立衆生於清淨智令  
一切衆生得一切智平等功德清淨法身令  
一切衆生悉捨愚癡觀察善根平等滿足令  
一切衆生得一薩婆若成等正覺平等滿足  
令一切衆生離諸惡趣出生一道一切種智  
平等滿足令一切衆生得一衆清淨悉能普  
淨一切大衆平等智慧而莊嚴之令一切衆  
生於一佛刹普見一切諸如來刹平等滿足  
令一切衆生一切莊嚴不可說莊嚴不可量  
莊嚴無盡莊嚴莊嚴一切佛刹平等滿足令  
一切衆生分別解了無量諸法見甚深義平  
等滿足令一切衆生得諸聖行諸佛自在平  
等滿足令一切衆生非一非異諸神通力平

等滿足令一切衆生隨順善根普為諸佛甘  
露灌頂令一切衆生清淨智身平等具足如  
是菩薩摩訶薩憐愍饒益衆生大悲哀念衆  
生令一切衆生皆悉清淨離慳嫉結具足無  
量無邊善妙功德常樂勝法離瞋恚及諸  
障礙其心柔軟離癡正直而無邪曲所行堅  
實不可沮壞得不退轉平等之心白淨法力  
皆悉成就不惱不失善解迴向修習功德調  
伏衆生除滅一切諸不善業專精苦行普教  
一切具足修習苦行善根為諸衆生具受衆  
苦慧眼清淨觀察善根習慧聖行善根迴向  
一切衆生令一切衆生安住清淨微妙功德  
遠離熾然成就等心善根迴向令一切衆生  
得薩婆若修習迴向攝取衆生一切善根平  
等具足具足成就等心迴向以如是等無量

善根迴向衆生令一切衆生常得安隱令一切衆生常得清淨令一切衆生常得安樂令一切衆生得究竟解脫令一切衆生得究竟平等令一切衆生得自在神力令一切衆生安住白法令一切衆生得無障眼令一切衆生調伏諸根令一切衆生具足十力教化衆生菩薩摩訶薩修行如是善根迴向時不著業迴向不著報迴向不著身迴向不著利養迴向不著諸刹迴向不著諸方迴向不著衆生迴向亦不離衆生迴向不著一切迴向不著法迴向菩薩摩訶薩如是迴向時作如是念令一切衆生滿足佛智得清淨心智慧分別內心寂靜外緣不亂得在三世諸佛家生菩薩摩訶薩行如是迴向勝出一切無能壞者一切衆生悉共讚歎所不能盡普行一切

諸菩薩行以少方便遍詣諸刹悉見諸佛無所障礙又見諸刹一切菩薩修習衆行悉得一切巧妙方便分別一切法陀羅尼演說妙法教化衆生盡未來劫未曾斷絕於念念中不可說不可說諸佛世界悉現受生猶如電光於念念中悉能嚴淨不可說不可說諸佛世界修行嚴淨佛刹智慧而無虧足令不可說不可說衆生清淨成就平等滿足隨其所住善根悉能具足諸波羅蜜攝取衆生除滅垢穢成就淨業得無礙淨耳於不可說不可說世界佛轉法輪悉聞受持於彼諸佛不生遠想乃至未曾一彈指頃不聞正法住無所有無依無染無著無行堅固不壞菩薩神力於念念中不可說不可說一切佛刹隨其所應悉現其身修菩薩行常與同見從事不相



違背菩薩摩訶薩修菩薩行時成就如是無量無邊清淨功德說不可盡況成無上菩提得最正覺所謂一切佛刹清淨平等一切眾生清淨平等一切身清淨平等一切根清淨平等一切業報清淨平等一切眷屬清淨平等滿足諸行清淨平等方便入一切法清淨平等滿足一切如來諸願迴向清淨平等示現一切諸佛境界自在清淨平等菩薩摩訶薩如是善根迴向已得一切清淨功德法門以諸功德而莊嚴之菩薩摩訶薩如是行迴坐十向不違一切刹刹不違眾生刹不違眾生業三十二眾生業不違刹思不違心心不違思思不違心境界心境界不違思業緣不違報報不違業緣業不違業迹業迹不違業法不違相相不違法法生不違性性不違法生刹平等不

違眾生平等眾生平等不違刹刹平等一切眾生平等不違一切法法平等一切法法平等不違一切眾生平等離欲際平等不違一切眾生安住平等一切眾生安住平等不違離欲際平等過去不違未來未來不違過去過去不違未來現在未來現在不違過去世世平等不違佛平等佛平等不違世世平等菩薩行不違薩婆若薩婆若不違菩薩行菩薩摩訶薩行如是迴向得平等業得平等報得平等身得平等道得平等願得平等一切眾生心得平等一切刹刹得平等一切行得平等一切智得坐十三世諸佛平等得見諸佛及諸菩薩得一切善根得滿足一切願得成就一切眾生得善分別一切諸業得見一切諸善知識悉令歡喜得清淨大眾得究竟諸佛正教得究竟一

切白淨法迴向佛子是為菩薩摩訶薩第七  
 等心隨順一切衆生迴向菩薩摩訶薩成就  
 此迴向已則能摧伏一切怨敵悉能拔出一  
 切欲刺得無生道到無二處得無量自在功  
 德之王救護衆生神足無礙遍遊諸刹常樂  
 寂靜於一切身而得自在悉能出生菩薩大  
 行於諸行願得自在智分別了知一切諸法  
 悉能遍生一切佛刹得無礙耳聞一切刹所  
 有音聲得淨慧眼見一切佛修諸善根未曾  
 休息具足成就一切諸法菩薩摩訶薩以此  
 等心隨順一切衆生迴向迴向諸善根爾時  
 金剛幢菩薩承佛神力普觀十方以偈頌曰  
 菩薩具行諸功德 深遠清淨甚微妙  
 所行功德雖微小 悉能迴向廣無量  
 菩薩一切資生具 珍妙奇特貴無價

象馬寶王諸輦輦 種種寶衣及衆珍  
 已身頭目并手足 破骨出髓割肌肉  
 充滿無量諸世界 悉以惠施無貪吝  
 如是無量無邊劫 一切普施不退轉  
 以此功德悉迴向 救度無量衆生故  
 菩薩饒益一切衆 清淨功德諸妙願  
 安樂三有群生類 悉令究竟證菩提  
 菩薩平等發大願 隨順修習清淨業  
 令一切衆得平等 於彼願中無所著  
 普於世間無嫌恨 悉能隨順行諸願  
 悉能迴向群生類 不違一切諸賢聖  
 一切世間智慧日 斯從布施淨戒生  
 勤修精進無懈怠 於一切願不退轉  
 菩薩迴向到彼岸 能開清淨妙法門  
 得兩足尊勝智慧 分別實義到彼岸

菩薩梵音悉究竟 具足堅固妙智慧  
 深入正法離障礙 菩薩於彼意無著  
 菩薩心淨不作二 亦復不作不二法  
 捨離二法不二法 覺悟衆生語言道  
 菩薩覺悟世平等 諸心音聲一切業  
 一切衆生猶如化 悉從因緣業報轉  
 一切世間所造作 十方無量業音聲  
 悉從業緣之所起 應滅彼業令無餘  
 菩薩觀察一切衆 身口意業悉平等  
 普令衆生得平等 猶如一切無等等  
 菩薩善根悉迴向 普令衆生色清淨  
 具足一切諸功德 悉同無上調御士  
 一切衆中最殊勝 具足功德妙法身  
 功德大海悉迴向 饒益安樂諸群生  
 我所修行諸功德 普令一切悉清淨

諸佛清淨無倫匹 三十一 普令世間亦如是 三十二  
 平等善根悉迴向 令一切衆知實義  
 微妙智慧功德滿 悉與一切如來等  
 菩薩觀察一切法 世間寂滅空無餘  
 無有造作無造者 亦復不壞諸業報  
 於彼靜亂無有二 悉以等心正觀察  
 菩薩真實解世間 遠離一切諸虛妄  
 如是真實佛子等 從諸如來法化生  
 無量功德悉迴向 一切疑惑悉除滅  
 大方廣佛華嚴經卷第二十

音釋

諮 津私切訪問 悒 良何切 瘡 力求切肉 輦 於善為諮 輦 輦力長切王若所乘之車 輦 謂之輦輦平諸切其與同